



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁL

Komunikadu Imprensa

25 Novembru 2013

Tribunál Distritál Oe-cusse julga kazu Omisídiu agravadu

Iha 19 Novembru 2013, Tribunál Distritál Oe-Cusse julga kazu omisídiu agravadu. Arguidu ba kazu ne'e ho inisiál (AN) hasoru vítima Amelia Beno (matebian) iha 13 Janeiru 2013, iha Distritu Oe-Cusse. Motivu husi akontesimentu tanba vítima hakilar “tiu book hau”.

Ministériu Públiku akuza arguidu katak iha 13 Janeiru 2013 tuku 13:00 meudia arguidu la'ó hamutuk ho vítima, too iha dalan klaran vítima hateten atu sosa tabaku, Nune'é arguidu hasai tabaku lulun hat no fó ba vítima maibé derepente vítima hakilar dehan “tiu book hau.”

Ho liafuan ida ne'e arguidu kaer kedas vítima nia liman karuk, rasta vítima ho obrigatoriu ba iha ai laran. Iha ne'ebá arguidu hasai katana ne'ebé tara hela iha nia kalilin hodi taa vítima iha kakorok parte los dala ida, kakorok parte oin dala rua, kanuruk dala ida no kontinua taa iha parte kotuk laran dala ida hodi rezulta vítima mate iha fatin akontesementu.

Arguidu nia hahalok ne'e kontra artigu 139 alinea (c) Kódigu Penál konaba krime omisídiu agravadu.

Iha audiénsia laran arguidu rekoñese no konfesa katak nia taa duni vítima tanba hakilar dala hat dehan arguidu bok nia. Arguidu arrepende ba nia hahalok.

Tanba arguidu konfesa ninia hahalok nune'é tribunál la presiza rona tan testemuña no kontinua ba alegasaun finál.

Ministériu Públiku alega, katak arguidu konfesa nia mak oho duni vítima ho razaun tanba deit vítima hakilar “tiu book hau”, maibé tuir losarguidu nia intensaun atu halo relasaun seksuál ho vítima. Hahalok arguidu hanesan rasta no obriga lori vítima ba ai laran hodi taa vítima too mate iha fatin akontesementu priense duni rekejitus krime omisídiu agravadu. Nune'é Ministériu Públiku husu ba tribunál atu aplika pena ne'ebé justu ba krime gravé ne'e.

Defeza iha ninia alegasaun finál argumenta katak los duni arguidu komete krime ne'ebé Ministériu Públiku akuza maibe husu tribunál atu tetu mós ba sirkunstansia atenuantes hanesan arguidu arrepende ninia hahalok, iha oan nain lima, foin primeiraves komete krime no hakarak kolabora ho tribunál maske besik tinan ida nia iha liur. Nune'é defeza husu tribunál atu fó pena ne'ebé favorese ba arguidu.

Krime omisídiu agravadu nia moldura penál husi tinan sanulu resin rua to'ó tinan rua-nulu resin lima prizaun.

“JSMP husu tribunál atu produs provas suficiente ba kazu ida ne’e no kondena arguidu ho pena ne’ebé refleita ba gravidade krime ne’ebe arguidu komete. Hare husi motivu kazu ida ne’e no kazu injeral ne’ebé feto sai vítima hatudu katak feto barak iha situasaun vulneravel tebes iha sira nia vida moris. Feto barak lakon sira nia vida tanba deit atu proteje sira nia aan husi ameasa no aktu krime ruma ne’ebé sira hetan. ,” dehan Casimiro dos Santos Direitór Interinu JSMP.

Prosesu lee sentensa sei hala’ó iha 6 Dezembru 2013, tuku 09:00 dader.

Prosesu julgamentu ne’e dirije husi juis Dr. João Ribeiro, Dr. Júlio Gantes, no Dra. Julmira Freitas, Ministériu Públiku reprezenta husi Dr. Alfonso Lopes no parte defeza reprezenta husi Dr. Afonso Fatima Gomes.

Casimiro dos Santos

Diretór Interino JSMP

Diresaun e-mail: santoscas.76@gmail.com

info@jsmp.minihub.org

Telefone: 3323883|77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPTl